

Desaroyador di Downtown Development ta premira continuacion di proyecto sigur

Parti di fondo di Gobierno pa e proyecto ta deposita caba na DOW pa cuminsa cu e trabou

Den cuestion di 60 dia sector priva lo kier concretisa parti financiero



Raoul C. Henriquez

ORANJESTAD – No por papia di un ultimatum mas pa e proyecto keda ehecuta. Esaki ta pensamento di e desaroyador di e proyecto ambicioso miyonario Downtown

Development Corporation, Raoul C. Henriquez. E desaroyador ta den proceso pa localisa e placa necesario pa sera 6 miyon florin pa asina nan proyecto por continua. Henriquez ta completamente di acuerdo cu e pensamento di Gobierno cu nan tin cu pone e resto di placa pa asina e proyecto por completa manera un private/public partnership tin cu funciona.

Henriquez ta compronde e ponencia pues di Prome Minister Oduber pa exige no menos cu 6 miyon di e placa di proyecto bin di e grupo priva. Ta na sector priva awor pa hiba e proyecto na e „next level” segun Henriquez a sigui bisa. De hecho Henriquez a compronde cu parti di e placa

di Gobierno a keda deposita caba riba cuenta di DOW pa asina nan por cuminsa ehecuta nan plan di utilidad.

E proyecto ta rekeri un cierto tipo di calidad di servicio hunto cu landscaping y un cantidad di otro asuntonan regla. Tur esaki mester keda bon regla segun Henriquez. Awor mester facilita e fondonan cu entre otro ta wordo yuda door di Aruba Investment Bank cu segun Henriquez ta hungando un papel importante. Lo tin intencion di purba haya ayudo di parti di doñonan di edificio pa nan na nan turno haya un tipo di ayudo cu interesnan interesante pa financiamiento di e 6 miyon florin. Esaki no ta cla ainda y como tal ta serando cabes cu nan.

E doñonan di edificio tin cu tuma e desicion final si nan ta bay di acuerdo cu e proyecto, y wak si nan ta mira e merito y importancia pa un proyecto asina y wak si nan ta forma parti di dje.

Bek pa loke ta e 6 lunanan cu Gobierno lo a duna e desaroyadornan pa bin cu e placa, sino stop e proyecto, esaki tin cambio. E tabata pensamento berdad pa tin e margen di tempo aki, pero awor segun Henriquez, e impresion cu e desaroyador tin ta cu Gobierno ta mira cu Playa ta hopi decai, y cu tin un importancia general pa haci algo.

Como tal sector principal tin intencion pa idealmente den un

termino di 60 dia organisa nan mes di tal forma pa cana hunto cu Gobierno pa cu e ehecucion total. “Pero nos tin cu bay traha diligentemente pa yega na esey. Como tal mi no ta asina sigur cu e ultimatum ta asina relevante mas” Henriquez a bisa. Esaki pasobra e plan lo continua segun Henriquez su pensamiento.

Henriquez ta consciente cu lo ta sumamente lamentable si sector priva no tin su parti regla cu suficiente tempo pa tin e material y loke mester pa drecha nan parti di caya. Lo ta malo si DOW si keda cla cu su trabou mientras cu ainda sector priva no ta cla cu nan trabou. Esaki lo crea un molester dos biaha pa por traha den un forma organisa.